

DOMINGU XVIII TEMPUS KOMÚN – TINAN B

Tema

Liturjia Domingu da-18 Tempus Komún repete, mensajen husi leitura sira domingu liubá nian, asegura ita katak Maromak kompromete an atu oferese ba nia Povu ai-han ne'ebé fó moris rohan-laek.

Leitura dahuluk haktuir mai ita Maromak nia preokupasaun atu oferese ba nia Povu, ho atensaun lais no domin, ai-han ne'ebé fó moris. Maroma nia asaun la'ós de'it atu habosu nia Povu nia hamlaha fíziku; maibé hakarak mós (no liuliu) tulun Povu buras, sai tasak, manán mentalidade klood no egoísta, sai husi takan no foti konxiénsia kona-ba valór seluk.

Iha *evanjellu*, Jezús apresenta An nu'udar “paun” moris ne'ebé tun husi lalehan atu fó moris ba mundu. Ba sira ne'ebé tuir Nia, Jezús husu atu aseita “paun” ne'e – katak, rona liafuan sira Nia hateten, simu sira iha fuan, aseita valór sira, atu hakohak ninia proposta.

Leitura daruak dehan mai ita katak adezaun ba Jezús implika husik ema tuan no sai ema foun. Ida-ne'ebé aseita Jezús nu'udar “paun” ne'ebé fó moris no tuir Nia, sai ema seluk. Enkontru ho Kristu tenke signífika, ba naran ema ida, mudansa radikál ida, jeitu ida diferente liu atu hasoru Maromak, hasoru maun-alin sira, hasoru an rasik no hasoru mundu.

LEITURA I – Ex 16,2-4.12-15

Seksaun Ex 15,22-18,27 dezenvolve tema boot ida Pentateuco nian: marxa iha rai-fuik maran. Ita sei iha hela etapa dahuluk marxa ne'e nian – ne'ebé la'o husi hakur liu tasi, to'o iha Sinai. Epizódium tolu ne'ebé apresenta iha seksaun ida-ne'e trata kona-ba Povu nia murmura (kf. Ex 15,22-27; 16,1-21; 17,1-7). Eskema simpkes no nafatin hanesan: Povu deskonfia no murmura bainhira hasoru difikuldade sira, revolta kontra Moisés no to'o akuza Maromak ba deskonfortu sira mai husi la'o: bainhira sira atu simu kastigu tanba sira nia revolta, Moisés harohan daet iha Jahwéh nia oin no Na'i perdua Povu nia salan; maski salan, Jahwéh haraik ba Povu soin sira ne'ebé sira presiza. Relatu sira haktuir ho forma dramátika, krexendu iha intensidade to'o konkluzaun finál, ne'ebé nafatin apresenta ho Maromak nia intervensaun beran boot ba Povu nia benefísiu.

Provavelmente, relatu sira-ne'e soi nu'udar baze elementu ho karakter istóriu; maibé, katekista bíbliku sira iha interese liu atu halo katekeze, duké apresenta reportajen jornalístika ida viajen nian. Katekeze (“jahwista” sékulu X mK kahur katekeze “saserdotál” sékulu VI mK) hakarak aviza Povu kontra tentasaun atu buka mahan no seguransa la'ós iha Jahwéh... Iha-ne'e, Israel hateten kona-ba filafali ba Ejitu, iha-ne'ebé sira sai atan, maibé iha paun no na'an naresin: Ejitu reprezenta tentasaun ne'ebé Povu sente, iha situasaun barak ninia istória nian, fila ba kotuk, husik valór no Maromak nia vida, atu hela ho komodidade dook husi Maromak. Katekista jahwista garante ba nia Povu katak Maromak akompaña nafatin nia iha nia dalan tomak no Nia de'it maka oferese ba Israel vida iha abundánsia.

Epizódium ohin nian iha nu'udar fatin rai-fuik maran Sin nian, “entre Elim no Sinai, iha loron da-15 fulan daruak liutiha tempus sai husi Ejitu” (Ex 16,1).

Istória manu kodornís iha nu'udar baze fenomenu ida ne'ebé observa, dala ruma iha Península Sinai nian: migrasaun iha massa manu sira ne'e nian ne'ebé, hakat liu tiha tasi, ba to'o iha Sinai kole liu ho viajen, sira deskansa iha beduínu sira nia tenda no husik ema kaer sira lais liu. Istória maná nian iha nu'udar baze ai-hun ki'ik ida (“tamarix mannifera”) ne'ebé moris iha zona ruma Sinai nian, ne'ebé hasai ai-been mahar hafoin koagula kedas; beduínu sira ohin loron mós sira

sei foti substánsia ne'e (sira hanaran "man"), halo nabeen iha loro-matan no tau iha paun leten. Ho elementu sira-ne'e – elementu ne'ebé Povu koñese no impresiona sira, durante sira-nia marxa iha rai-fuik maran – maka katekista bíbliku sira hato'o katekeze ne'ebé ita-nia testu ohin haktuir.

MENSAJEN

1. Epizódiu hahú ho Povu ne'ebé murmura "kontra Moisés no kontra Aarão" (vers. 2). Israel sente saudades ho tempu nia hela iha Ejitu maski moris-atan nian, no tuur hale'u sana nakonu ho na'an no han paun to'o bosu (kf. vers. 3). Durante viajen sira koko limitasaun no defisiénsia grupu umanu ida ne'ebé sei iha mentalidade atan nian, matak hela, seidak tasak no lahó maturidade, kesi an ba hahalok aat, egoízmu, komodizmu, prefere eskravidaun duké liberdade. Povu ida ne'ebé, seidak aprende atu konfia iha nia Maromak, atu tuir Nia lahó ezitasaun ba ninia proposta sira, ho modu inkondisionál iha dalan fiar nian.
2. Maromak nia resposta mak halo "paun tuun husi lalehan" (vers. 4) no fó ba Povu na'an ne'ebé naresin (vers. 12). Maromak nia objetivu la'ós de'it habosu Povu nia nesesidade materiál, maibé mós revela An nu'udar Maromak laran-di'ak no domin nian, ne'ebé tau matan ba nia Povu, ne'ebé nafatin iha nia sorin tuir nia dalan, ne'ebé ho kbiit entrega bandeja ba Israel ho possibilidade atu satisfás ninia nesesidade bázika sira no manán forsa mate nian ne'ebé subar iha rai-henek dezertu nian. Nune'e, Povu bele halo esperiénsia enkontru no komuñau nian, ne'ebé tradús nu'udar konfiansa, domin, saran an. Maromak nia kuidadu, atensaun lais no domin iha "krize" ne'e, la tulun de'it Povu atu kontinua moris, maibé mós supera mentalidade klood no egoísta sira, halo sira haree dook liután, haluan orizonte sira, halo sira sai adultu liután, konxiente liután, responsavel liután, santu liután. Israel aprende, ho forma ne'e, atu konfia iha Maromak, atu saran an ba Nia, atu la duvida ninia domin no fidelidade... Israel aprende, iha perkursu ne'e, katak Jahwéh maka fatuk seguru ne'ebé nia bele konfia iha krize laran no drama sira moris nian.
3. Iha testu dehan katak Maromak fó ba Povu maná ne'ebé natón de'it ba loron ida-idak (kf. vers.4): lisaun furak ida kona-ba dezapegu no konfiansa iha Maromak. Hakarak hanorin Povu atu la akumulá soin sira, atu la moris atu "soi/iha", atu liberta fuan husi kaan no hakaran atu soi barak ba beibeik, atu keta preokupa ho futuru ho loron aban nian; hanorin mós, atu konfia iha Maromak, atu saran an ho hakmatek iha nia liman, haree Nia nu'udar bee-matan loos moris nian.

LEITURA II – Ef 4,17.20-24

Ita kontinua lee Surat ba Eféziu sira, "surat sirkulár" ne'ebé Paulo hakerek enkuantu hela iha prizaun (iha Roma, durante tinan 61-63?) no haruka ba comunidade kristán iha parte loromonu Ázia Menór nian. Surat ida (ita dehan tiha ona uluk) iha-ne'ebé Pulo apresenta ho forma hakmatek, reflète kle'an teolojia tasak ida, kompleta, elabora di'ak kona-ba eziyénsia moris foun nian iha Kristu.

Seksaun Surat ba Eféziu sira ne'ebé bá husi 4,1 to'o 6,20 (ita mós dehan tiha ona domingu kotuk) maka testu ezortasaun nian, ne'ebé iha objetivu prinsipál/mahuluk atu ezorta sarani sira atu moris ho forma koerente ho ninia Batizmu no ninia kompromisu ho Kristu. Konvida tiha fiar-na'in sira atu moris iha unidade domin nian (kf. Ef 4,1-6) no apresenta tiha reflesaun ida kona-ba comunidade, Kristu nia Isin forma husi membru barak (kf. Ef 4,7-13), Paulo husu sarani sira atu moris tuir sira-nia kondisaun Ema Foun nian iha Kristu (kf. 4,14-5,14). Testu ohin nian maka parte ida ezortasaun ne'e nian.

MENSAJEN

Ita-nia testu mak konvite ida ne'ebé Paulo ho laran-manas uza nafatin iha ninia ezortasaun sira, atu husik moris tuan ho ninia eskema sira, hodi hakohak vida foun ne'ebé Kristu propoin. Paulo uza espresaun oposta rua atu define ema nia realidade molok enkontru ho Kristu no hotu tiha enkontru ho Kristu. Ema ne'ebé seidaok adere ba Kristu, tuir Paulo, mak ema tuan ida, no nia moris marka ho mediokridade, ho lakon-tempu (vers. 17), ho korrupsaun, ho eskrauidau ba "hakaran ne'ebé bosok" (vers. 22). Ema ne'ebé hasoru ona Krsitu no hakohak ninia proposta maka ema foun, moris iha lialoos (vers. 21), iha justisa no santidade loos (vers. 24).

Batizmu – momentu adezaun nian ba Krsitu – maka momentu desizivu ema nia transformasaun nian husi ema tuan ba ema foun. Ritu Batizmu nian (luku iha bee signifika mate ba moris tuan salan nian; sai fali husi bee signifika ema foun ida moris mai, hamoos tiha husi egoizmu, husi loko-an, husi autosufisiénsia, husi salan) sujere transformasaun no moris-hi'as ba vida foun – moris iha Kristu. Husi ne'e, ema tenke foti maneira foun ida iha hanoin no iha hahalok, konsekuensi husi ninia kompromisu ho Kristu no ho proposta moris nian ne'ebé Kristu apresenta.

Maski ema hili tiha ona Kristu, nia kontinua lori marka sira ninia kondisaun frakeza no fragilidade nian... Kondisaun ida-ne'e, dala balu, halo nia sente tentasaun atu filafali ba ema tuan egoizmu nian, loko-an nian, salan nian... Fiar-na'in ida ho Espiritu nia kbiit, simu bolun atu hafoun loroloron ninia adezaun ba Kristu no atu harii ninia ezisténsia ho forma koerente ho kompromisu sira ne'ebé nia asume iha loron Batizmu nian. Ema foun la'ós realidade ida ne'ebé manán dala ida ba nafatin, iha loron nia hili Kristu; ida-ne'e maka realidade ida ne'ebé tenke halo nafatin, ne'ebé ezije serbisu kontínuu no renovasaun konstante.

EVANJELLU – Jo 6,24-35

Iha domingu kotuk, João haktuir mai ita oinsá Jezús fó han ema lubun-boot ho paun lima no ikan rua, iha Bee-lihun Tiberíades nia "sorin" seluk (kf. Jo 6,1-15). Bainhira "loron tuun", Jezús no dixípulu sira filafali ba Cafarnaum (kf. Jo 6,16-21).

Epizódiu ne'ebé Evanjellu ohin nian apresenta mai ita akontese iha Cafarnaum, iha "loron tuir mai" ba epizódiu multiplikasaun paun no ikan nian. Iha dadeer, ema lubun-boot ne'ebé sei hela iha "sorin seluk" haree katak Jezús filafali ona, sira bá hasoru Nia.

Ema lubun-boot hasoru Jezús iha sinagoga Cafarnaum nian – sidade ida iha Bee-lihun nia loromonu no iha-ne'ebé parte ida signifkativa Jezús nia atividade sira iha Galileia hala'o iha ne'ebá. Ema lubun-boot konfronta nia, entaun Jezús fó sai diskursu ida (kf. Jo 6,22-59) ne'ebé esplika sentidu ba jestu multiplikasaun paun no ikan.

MENSAJEN

Se haree liu de'it karik, iha parte dahuluk (vers. 24) parese katak Jezús nia pregasaun hetan susesu total: ema lubun-boot ho entuziazmu, buka Jezús no tuir Nia ba fatin hotu.

Maibé, Jezús komprende kedas katak ema lubun-boot buka nia ho razaun laloos. Loloos, multiplikasaun paun no ikan ne'e hakarak sai lisaun ida Jezús nian kona-ba domin, partilla no servisu; maibé sira la sensivel ba signifkadu kle'an jestu ne'e nian, sira hela de'it iha aparénsia no komprende de'it katak Jezús bele fó ba sira, ho forma gratuita, paun iha abundánsia. Nune'e, ema lubun-boot ne'ebé buka Jezús la signifika katak sira asume ninia proposta; signifika de'it katak, sira haree iha Jezús maneira fasil no baratu atu rezolve sira-nia problema materiál.

Loloos, jestu fahe paun sira ba ema lubun-boot hamosu inkomprensaun perigozu ida. Jezús konxiente katak presiza sobu lalais sira-nia inkomprensaun ida-ne'e. Nune'e, nia la hatán ba sira nia lia-husun ("Mestre, bainhira ita to'o iha ne'e?" – vers. 25); maibé, nia buka kedas klarifika sasán sira ne'ebé importante liu duké ninia filafali ba Cafarnaum... Liafuan ne'ebé Jezús dirije ba ema sira hale'u Nia tau problema ho forma tuirmai ne'e: sira la buka Jezús, maibé buka

rezolusaun ba sira-nia problema materiál (vers. 26). Ne'e maka babukak ida ho interesse, egoísta, ne'ebé absolutamente kontráriu ba mensajen ne'ebé Jezús buka ható'o ba sira. Identifika tiha problema, Jezús husik avizu ida ba sira: presiza haka'as an atu konsege, la'ós de'it ai-han ne'ebé habosu hamlaha fíziku, maibé liuliu ai-han ne'ebé habosu ema nia hamlaha ba moris. Ema lubun-boot hodi preokupa de'it ho ai-han materiál, nia haluha tiha buat esensiál – ai-han ne'ebé fó moris definitivu. Ai-han ida-ne'e fó moris rohan-laek mak ida Jezús lori mai (vers. 27).

Sá mak tenke halo atu simu paun ida-ne'e? – ema lubun-boot husu (vers. 28). Jezús hatudu momoos ho ninia resposta: presiza adere ba Jezús no ba ninia projetu (vers. 28). Iha epizódiu multiplikasaun paun sira-nian, ema lubun-boot la adere ba Jezús nia projetu (ne'ebé ko'alia kona-ba domin, patilla, servisu); sira halai tuir de'it profeta milagre-na'in ida ne'ebé fahe paun no ikan gratis de'it no iha abundánsia... Maibé, atu simu ai-han ne'ebé fó moris rohan-laek, presiza atu ema sira hakohak Jezús nia proposta sira no aseita atu moris iha domin ne'ebé sai prezente, iha partilla ba maun-alin sira, iha servisu simples no haraik-an ba ema seluk. Hodi simu no interioriza “paun” ida-ne'e maka bele manán moris ne'ebé la nahas.

Jezús nia interlokutór sira la konvensidu katak, “paun” ida-ne'e garante moris definitivu. Sira susar atu simu katak vida rohan-laek maka rezultadu husi domin, servisu, partilla. Sá maka garante, sira husu, katak ida-ne'e dalan loos ba moris definitivu (kf vers. 30)? Prova ida-ne'ebé hatudu katak ema nia realizasaun liu husi saran moris rasik ba ema seluk? Tansá maka Jezús la halo jestu espetkulár ida - hanesan Moisés, ne'ebé halo maná tuun husi lalehan, no la'ós de'it ba ema rihun lima, maibé ba Povu hotu no ho forma kontínua – atu sai prova katak proposta ne'ebé Nia halo maka loos duni fó moris (vers. 31)?

Jezús hatán hodi tau kestaun ho forma tuirmai: maná maka prezente ida Maromak nian atu habosu ninia Povu nia hamlaha materiál; maibé maná la'ós “paun” ne'ebé habosu ema nia hamlaha ba moris rohan-laek. Maromak de'it maka fó ba ema sira, ho forma kontínua, moris rohan-laek; no Maromak nia don ne'e la mai hasoru ema liuhusi Moisés, maibé liuhusi Jezús (vers. 32-33). Tan ne'e, importante liu la'ós haree jestu espetkulár, ne'ebé halo hakfodak maibé la muda buat ida; simu Jezús nia proposta no moris tuir iha jestu simples loroloron nian maka konta no fó moris.

Fraze ikus ita-nia testu nian identifika Jezús, la'ós ona nu'udar “maklorik” paun nian, maibé nu'udar paun ne'ebé Maromak hakarak oferese ba nia Povu atu habosu ninia hamlaha no hamrook ba moris (vers. 35). “Han nia” katak rona nia Liafuan, hakohak ninia proposta, asimila ninia valór sira, interioriza ninia jeitu moris nian, halo vida (hanesan Jezús halo) don totál ida ba maun-alin sira. Hodi tuir Jezús, hakohak ninia proposta iha fuan no husik nia nakfilak iha jestu konkretu domin nian, partilla nian, servisu nian, ema sei hetan “kualidade” moris nian ne'ebé lori ba realizasaun nakonu, ba moris rohan-laek.